

異
北
戸
物
錄
附
校
勘
記
志



異物志

楊曾
李釗
撰輯

編主五雲王

編初成集書叢

種一他其及志物異

中華民國二十五年十二月初版

發行人

王

雲

五

上海河南路

印刷所

商務

印書館

上海河南路

發行所

商務

印書館

上海及各埠

徐

*D七〇九四



叢書集成

初編

主編 王雲五

商務印書館發行

本館據嶺南遺書
本排印初編各叢
書僅有此本

異物志

漢 南海楊 孚孝元撰

清 南海曾 釗勉士輯

金鄰一名金陳。去扶南可二千餘里。地出銀。人民多好獵大象。生得乘騎。死則取其牙齒。御覽七百九十。

穿胸人。其衣則縫布二尺。幅合兩頭。開中央。以頭貫穿。胸不突穿。御覽七百九十。

西屠國。在海水。以草漆齒。用白作黑。一染則歷年不復變。一號黑齒。御覽七百九十。

按漆水疑當作海外。漆齒當作染齒。御覽黑齒國下引異物志曰。西屠染齒。亦以放此也。可證此漆爲染之譌。

狼臙國。男無衣服。女橫布帷。出與漢人交易。不以晝市。暮夜會。俱以鼻嗅金。則知好惡。御覽七百九十。

按狼臙疑與藝文類聚事類賦引狼臙爲一。然臙御覽音燕。又似別爲一國。故並存之。

食人齒及目甚鮮白。面體異黑若漆。皆光澤。為奴婢。強勤力。御覽七百九十。

雕題國。畫其面皮。身刻其肌而青之。或若錦衣。或若魚鱗。御覽七百九十。

烏澹。南蠻之別名。巢居鼻飲。射翠取毛。割蚌求珠為業。無親戚。重寶貨。賣子以接衣食。若有賓客。易子而

烹之。太平寰宇記一百六十四。

烏澹。南夷別名也。其落在深山之中。其種族為人所殺。則居其死所。且同殺主。若有過之者。是與非則仇

而殺之。文選吳都賦。劉淵林注。

狼臚民。與漢人交關。常夜市。以鼻齧金。知其好惡。事類賦九。

按藝文類聚卷八十三引。常夜市句。作常夜為市。

扶南國。昔但作大扇。遣人持之。不知人各自用也。事類賦十四。

牂牁者。繫船筏也。其山在海中。小而高。似繫船筏也。俗人謂之越王牂牁。遠望甚小。而高不似山。望之以

為一株樹在水中也。御覽七百七十一。

按後漢書四夷傳注引作牂牁繫船杙也。

漲海崎頭水淺而多磁石。徼外人乘大舶皆以鐵葉錮之。至此關以磁石不得過。

黃泰泉廣東志二十四

黃頭人羣相隨行無常居處其類與禽獸同。或依大樹以草被其枝上而庇陰其下。髮正黃如掃帚。見漢人散入草終不可得也。御覽七百九十

儋耳夷生則鏤其頭皮尾相連并鏤其耳匡為數行與頰相連狀如雞腹下垂肩上食蔬紡績為業。

御覽七百

九十

交趾有橘官置長一人秩三百石主歲貢御橘。

海錄碎事二十二

按事類賦卷二十七引與此同。惟初學記卷二十引稱楊孚異物志今兩存之。

合浦民善游採珠兒年十餘歲使教入水官禁民採珠巧盜者蹲水底刮蚌得好珠吞而出。

藝文類聚八十四

錦鳥文如丹地錦而藻纒牙交俗人見其似錦因謂之錦鳥。

初學記二十九

形微大於雉其雌特有文章五色甚

可愛。御覽七百二十八

按藝文類聚牙交作采文。

木客鳥。大如雀。數千百頭為羣。飛集有度。不與衆鳥相廁。人俗云木客白黃文者謂之君長。有翼有綬。飛高而正赤者在前。謂之五伯。居前正黑者謂之鈐下。細色而頰雜者謂之功曹。左脇有白帶似鞞囊者謂之主簿。長次君後。其五曹官屬各有章色。廬陵郡東有之。御覽九百二十七

鷓鴣。不生卵而孕雛於池澤間。又吐生。多者八九。少者五六。相連而出。若絲緒。水鳥而巢高樹枝。或在窟

穴之間。御覽九百二十五

按此條與陸佃埤雅稱楊孚異物志文字略同。

鷓鴣。巢於高樹顛。生子未能飛。皆銜其母翼。飛下地飲食。御覽九百二十五

鷓鴣。其形似雌雞。其志懷南。不思北。其名呼飛。但南不北。其肉肥美宜炙。可以飲酒為諸膳也。御覽九百二十四

黃泰泉廣東志引作不思北徂。又其名呼飛。作其嗚呼飛。

鳥象雌雞。自名鷓鴣。其去懷南。不思北徂。黃泰泉廣東志五十四。

翠鳥。似鷺。翡赤而翠青。其羽可以為飾。御覽九百二十四。

按章懷太子後漢書賈琮傳注。引楊孚異物志同。班彪傳注。引作可以飾幃帳。

翡。赤色。大於翠。文選李善注十三。

孔雀。形體既大。細頸隆背。似鳳凰。自背及尾。皆作員文。五色相繞。如帶千錢。文長二三尺。頭戴三毛。長寸

以為冠。足有距。栖遊岡陵。迎晨則鳴。相和。御覽九百二十四。

孔雀。其大如雁。而足高。毛皆有斑文。采捕得畜之。拍手則舞。御覽九百二十四。

鵬鳥。大如雄雞。色赤或黑。而能鳴。彈射取之。其肉香美。中作炙。御覽九百二十八。

苦鳥。聲如人音。多懷悽愴。海錄碎事二十二。

東北荒中有獸名獬豸。一角。性忠。見人鬪則觸不直者。聞人論則咋不正者。續漢志劉昭注三十。

南方人以獼猴頭為酢。御覽九百一十。

狢。獼類。露鼻。尾長四五尺。樹上居。雨則以尾塞鼻。建安臨海北有之。鼯大如猿。肉翼若蝙蝠。其飛善從高

集下。食火烟。聲如人號。一名飛生。飛生子故也。東吳諸郡皆有之。文選五劉淵林注。

獾。然。猿狢之類。居樹。色青赤有文。日南九真有之。文選五劉淵林注。

獾。猿屬。頭形正方。髮長尺餘。皆蒼色。犬類似人。欲有所視。輒搖頭。兩手披髮。不爾則覆障其兩目。衣毛皤

皤。若披狐裘。木居深藏。密伺乃得見耳。御覽九百八。

獼母。狀如猿。逢人則叩頭。小打便死。得風還活。廣韻一。

交趾封溪有猩猩。夜聞其聲。如小兒啼也。文選五劉淵林注。

鬱林大豬。一蹄有四五甲。多膏。買者以鐵錐刺其頭。入七八寸。得赤肉乃動。御覽九百三。

日南多馱牛。日行數百里。太平寰宇記一百七十一。

周留。如水牛也。毛青大腹。銳頭青尾。初學記三十一。蒼毛豕身。角若擔矛。衛護其犢。與虎為仇。黃泰泉廣東志二十四。

麋狼。形似鹿而角觸前向。入林則挂角。故恆在平淺草中。逐入林則得之。皮可作履襪。角口口口。南人因

以作踞牀。初學記二十五。

按入林則得之句。與御覽引同。廣韻作則搏之。角下缺字。後漢書南蠻西南夷傳注。作正四據三字。平

淺草中。後漢書注有肉肥脆香美五字。因以作踞牀。後漢書注作因以為牀。無踞字。

麋狼。大如麋。角前向。有枝下出。反向上。長者四五尺。廣州有之。常居平地。不得入山林。文選五劉淵林注。

犀角中特有光耀。白理如線。自本達末。則為通天犀。章懷太子注後漢書三。

靈狸。一體自為陰陽。刳其水道連囊。以酒灑陰乾。其氣如麝。若雜真香。罕有別者。用之亦如麝焉。大觀本草十七。

白蛤狸。刳其外革囊。以酒灑而陰乾之。其氣如麝。若雜真麝中。鮮有別者。御覽九百八十三。

鼠母。頭脚似鼠。毛蒼口銳。大如水牛。而畏狗。水田時有。外災起於鼠。初學記三十一。

高魚與鱒相似。與蜥蜴於水上相合。常以二三月。有雌無雄。食其胎殺人。御覽九百四十。

鯨魚長者有數十里。雄曰鯨，雌曰鯢。或死於沙上，得之者皆無目。俗言其目化為明月珠。文選五劉淵林注。

朱厓有水蛇，鯨魚出合浦，長二三尺，背上有甲珠文，堅強可以飾刀口，可以為鑪。文選五劉淵林注。

蘆鯀似鱗蝨，而有細文，多膏，肥美，形大如蘆管，本出地中，隨泉浮出，俗名蘆鯀。御覽九百四十。

南方魚多不肥美，惟鯨魚為上，大者長二尺，作鱠炙，尤香而美。御覽九百四十。

懶婦魚，昔有懶婦，織於機中常睡，其姑以杼打之，恚死，今背上猶有杼文瘡痕。大者得膏三四斛，若用照

書及紡織則暗，若以會衆寡歌舞則明。太平寰宇記一百六十五。

按海錄碎事引，與此文字略異，此引會衆寡歌舞句，似有誤文，當從海錄碎事作宴會歌舞。

蠶風魚，冬天數千萬頭，共處大窟中，藏上有白氣，或在蠶穴中，皮黑如漆，能潛知數里中空木所在，因風

而入空木，化為蝙蝠，其肉甚美。御覽九百四十。

鹿魚，頭上有兩角如鹿。初學記三十。

鮫魚皮可以飾刀。其子驚則入母腹中。初學記三十。

瑇瑁如龜。生南海。大者如籬條。背上有鱗。鱗大如扇。有文章。將作器。則煮其鱗。如柔皮。廣韻四。

蝦種多。蛭最大。中作肺。御覽九百四十三。

蚌似車螯。絜白如玉。文選李善注十二。

蠨蝓子如蠶子。著草。葉得其子。母自飛來就之。廣韻一。

玉出崑崙。大觀本草三。

火齊如雲母。重沓而可開。色黃赤似金。出日南。文選五劉淵林注。

雲母一曰雲精。入地萬歲不朽。文選李善注十三。

榕樹栖栖。長與少殊。高出林表。廣蔭原邱。孰知初生。葛藟之儔。御覽九百六十。

木有摩廚。生於斯調。厥汗肥潤。其澤如膏。馨香馥郁。可以熬膏。彼州之民。仰為嘉肴。御覽九百六十

大觀本草卷二十二。摩廚子引。有生西域。二月開花。四月五月結實如瓜許。凡十六字。又馨香馥郁。作

馨香穰射。仰為嘉肴。作仰以為儲。末又有斯調國名也句。

斯調州有木名摩。樹汁如脂。太平寰宇記一百六十四

按此疑即上之摩廚。特脫廚字耳。

楸欄。機也。皮可作索。枸椴樹也。直而高。其用與楸欄同。楸欄出武陵山。枸椴出廣州。木棉樹高大。其實如

酒杯。皮薄中有如絲綿者。色正白。破一實得數斤。廣州日南交趾合浦皆有之。

文選五劉淵林注

木蜜名曰香樹。生千歲。根木甚大。先伐僵之。四五歲乃往看。歲月久。樹材惡者腐敗。惟中節堅直。芬香者

獨在耳。御覽九百八十二

大觀本草卷十二引。蜜香蟲名。其葉如椿。

檳榔若筍竹生竿。種之精硬。引莖直上。不生枝葉。其狀若桂。其顛近上。未五六尺間。洪洪腫起。若痲木焉。因拆裂出若黍穗。無花而為實。大如桃李。又棘針重累其下。所以衛其實也。剖其上皮。煮其膚。熟而貫之。

硬如乾棗。以扶留古賁灰并食。下氣及宿食白蟲消穀。飲啖設爲口實。齊民要術十。

檳榔樹若筍竹生竿。近上未五六尺間。洪腫起如癭木焉。因拆裂出。若麥秀也。無華而爲實。大如桃李。天生棘重累其下。所以禦衛其實也。剖其上皮。煮其膚。熟而實之。堅如乾棗。以夫留古賁并食。則滑美下氣。

及宿食消穀。藝文類聚八十七。

按此與齊民要術引有詳略。故並存之。

古賁灰。牡蠣灰也。與扶留檳榔三物合食。然後善也。扶留藤似木防。以扶留檳榔所生相去遠。爲物甚異。

而相成。俗曰扶留檳榔。可以忘憂。齊民要術十。

椰樹高六七丈。無枝葉。如束蒲在其上。實如瓠繫。在於山頭。若挂物焉。實外有皮如胡盧核。裏有膚白如

雪。厚半寸如豬膚。食之美於胡桃味也。膚裏有汁升餘。其清如水。其味美於蜜。食其膚。可以不饑。食其汁

則愈渴。又有如兩眼處。俗人謂之越王頭。齊民要術十。

按文選吳都賦。劉涓子注引。作飲之可以禦渴。與此引文義正相反。

荔支爲果多汁。味甘絕口。又小酸。所以成其味。可飽食。不可使厭。生時大如雞子。其膚光澤。皮中食乾則

醮。小則肌核。不如生時奇。四月始熟也。御覽九百七十一

按齊民要術卷十引。乾則醮作乾則焦。

十。藤實雖名三藤。或有五六。長短四五寸。藤頭之間正巖以正月中熟。正黃多汁。其味少酢。藏之益美。

齊民要術

十。

三廉大實。實不但三。食之多汁。味酸且甘。藏之尤好。與果相參。黃泰泉廣東志二十三

枸櫞實如橘。大如飯筥。皮不香。味不美。可以浣治葛紵若酸漿。齊民要術十

按太平御覽引作皮有香。與此文義大異。

橘樹白花而赤實。皮馨香。又有善味。江南有之。不生他所。齊民要術十

按藝文類聚八十引。與此文字少異。

橄欖生南海浦嶼間。樹高丈餘。其實如棗。三月有花生。至八月方熟。甚香。木高大難採。以鹽擦木身。則其

實自落。大觀本草二十三

二十三